

Ing. Marlon Croes, director di DOW

Green Corridor, un tremendo proyecto pa Aruba



ORANJESTAD – Un proyecto manera Green Corridor por a keda tira den lachi di diferente Gobierno mas, sino no tabata pa e vision di Gabinete Mike Eman I y II y su team di experto cu a yega na e conclusion cu esaki mester wordo realisa via e formula PPP: Public Private Public Partnership.

Durante desvelo di e borch grandi di e brug cu ta bay wordo construi riba Green Corridor, director di DOW ing. Marlon Croes a splica e importancia di PPP den un proyecto asina grandi na Aruba.

E proyecto Green Corridor y otronan cu tin 20 pa 30 aña wanta semper tabata pega na momento cu yega na e punto di financiamiento. “E ta asina algo asina grandi cu nunca nos a logra pone riba nos presupuesto,” Croes a splica.

Finalmente na 2009 a mira luz na horizonte. Gobierno a manda algun persona pa un curso na Washington D.C. unda a duna splicacion di proyectonan di infraestructura di un magnitud cu ta dificil pa financia, specialmente pa pais nan chikito, manera islanan. Den e curso aki a papia ampliamente di e structura di proyectonan di e tipo “PPP”.

Green Corridor ta un tremendo proyecto pa Aruba. Na Aruba e pensamiento a wordo gara pa Gabinete Mike Eman I cu mesora a busca apoyo di Rijkswaterstaat y a cuminsa traha riba e proyecto Green Corridor na 2010. Nan tabatin mester di pasenshi, segun Croes a splica, pasobra aunke cu tabata kier a bay mas lihe, tabatin un procedura cu mester a sigui cu ta

encera dialogo y destaho publico. “Tabata un trayectoria largo, pero di hopi satisfaccion pasobra nos a logra realisa un proyecto grandi den un concepto nobo. Mi tin cu gradici e team completo cu a asesora nos den e aspecto aki.” E formula PPP ta loke a logra cu Aruba por a realisa cuatro proyecto grandi, manera Green Corridor, Watty Vos

Boulevard, Waf di Container nobo na Barcadera y renovacion y ampliacion di dr. Horacio Oduber Hospital. E ta un formula via cual un compania ta financia, construi y mantene e proyecto. E compania ta keda responsabel pa añanan largo pa su manencion. Gobierno na final ta paga un tipo di “lease” pa luna durante cierto cantidad di aña.